

ҚАЗАҚ

№ 30 (1499)

1 қазан
2013 жыл



АЛ-ФАРАБИ АТЫНДАҒЫ ҚАЗАҚ ҰЛТТЫҚ УНИВЕРСИТЕТІ

УНИВЕРСИТЕТІ

Апталық 1948 жылдың 20 сәуірінен шыға бастады

www.kaznu.kz

ҚАЗАҚ МЕМЛЕКЕТІ АТАНУ ҮШІН ҰЛТТЫҚ ТӘРБИЕНІ ЕРЕКШЕ ЖАНДАНДЫРУЫМЫЗ ҚАЖЕТ

Ұлттық тәрбие мәселесі – Қазақстан егемендігі мен тәуелсіздігінің жемісі. Мұның негізгі мазмұны – жас ұрпақ тәрбиесінде ата-бабаларымыздың ғасырлар бойы тірнектеп жыйған салт-дәстүрін 12 жылдық оқу-тәрбие процесінің барлық салаларына түбегейлі енгізу. Біздің ұлттық құндылықтарымыз – қоғамдық өмірдің кез келген саласын дамытуға қозғау салатын негізгі тірек. Мұндай пікірмен педагогика ғылымдарының және психология ғылымдарының докторы, профессор, академик Құбығұл Жарықбаев «Қазақтың өзіндік ұлттық тәрбие концепциясы, оның жүзеге асырылу жолы» атты тақырыпта жуырда өткен дөңгелек үстел барысында бөлісті. Жалпы ұлттық тәрбие концепциясын жүзеге асыруды назарға алған бұл басқосу әл-Фараби атындағы ҚазҰУ-да психология бөлімшесінің ашылғанына 25 жыл толуына орай Т. Тәжібаев атындағы этнопсихология және этнопедагогика оқу-зерттеу орталығы мен «Мектептегі психология-Психология в школе» журналы редакциясының ұйымдастыруымен жүзеге асты.



Биология және биотехнология факультетінде биофизика және биомедицина кафедрасының меңгерушісі профессор С. Төлеуханов жетекшілігімен Тілдер апталығына орай «Тіл – тәуелсіздігіміздің тірегі» атты поэзиялық кеш өтті.

Қазақ тілі – ең бай, көркем, ең таза тілдердің бірі. Қазақтың тілінде оның сайран даласы, көп жылғы тарихы, ұлтымыздың әдет-ғұрпы, салт-дәстүрі, сабырлы мінезі көрініс тапқан. Жиында факультет оқытушылары мен студенттері анамыздың ақ сүтімен бойымызға дарыған тілімізді сақтап қалу, келешек ұрпаққа жеткізу тұрғысынан біршама озық ойларымен бөлісті. Сондай-ақ студенттер ден Меруерт Алданова «Мен қазақпын», Әсел Молдабаева «Мен қазақтың қызымын» және Бекжан Бердіқұлов «Таныс», «Сорлылық» атты қара өлең шумақтарын оқыды. Ал Қанат Құлымбет және Бекжан Бердіқұлов күмбірлетіп күй

төкті. Гүлдана Дәулет тіліміздің терең тарихын тілге тиек етіп, мақал-мәтелдер айтып өтті. Осы кешті ұйымдастырған кафедра эдвайзері Г. Атанбаева: «Ұлтын, Отанын, тілін, дінін сүйген адам өз елін, туған жерін, халқын ешқашан да сатпайды. Сондықтан да ата-бабаларымыз аңсап келген тәуелсіздігімізді сақтау үшін өз тілімізді биікке көтеруге тиіспіз», – деп тұжырымдады.

З.А. АСҚАРОВА,
биофизика және биомедицина
кафедрасының доценті,
Наргиза САДЫКОВА,
3 курс студенті

Тіл - тірегіміз, соғып тұрған жүрегіміз

Гуманитарлық факультеттерге арналған шет тілдер кафедрасы 26 қыркүйекте заң, экономика және шығыстану факультеттері студенттерін ұйымдастырып, мерекелік концерт өткізді.

Студенттер концертті үш тілде: қазақ, орыс және ағылшынша жүргізді. Студенттерді туған тілді қастерлей отыра, өзге тілді де үйренуге

тәрбиелеуді мақсат еткен шарада қытай, италия, түрік, орыс, ағылшын тілдерінде әсем әуендер орындалды. Түрлі халықтардың билері қойылды. Әсіресе ана тілі туралы нақышымен оқылған өлең жолдары әркімді де ерекше бір сезімге бөледі.

Б.Н. АҚШАЛОВА,
гуманитарлық факультеттерге
арналған шет тілдер кафедрасының доценті

басты факторы болып табылатын қазақ тілінің одан әрі дамуы үшін барлық күш-жігерімізді салуымыз керек», – деген болатын.

Айжан КУЙКАБАЕВА,
жылуфизика және техникалық
физика кафедрасының оқытушысы

Қазақ тілі – егемендігіміздің басты белгісі

Мемлекеттік тілді дамыту, оның қолдану аясын кеңейту мәселесі бүгінгі таңда мемлекетіміз үшін аса маңызды. Осы тақырыпта заң факультетінің мемлекет және құқық теориясы мен тарихы, конституциялық және әкімшілік құқығы кафедрасы 25 қыркүйек күні №18 жатақханада студенттермен кездесу өткізді.

Қазақ ұлты, қазақ тілі – Қазақстан Республикасы мемлекеттігінің басты белгісі. Біздің еліміз Қазақстан қазақ елі болғандықтан, оның тілі – мемлекеттік тіл болып табылады. Қазақ тілі – мемлекеттік тіл мәртебесін 1989 жылы 22 қыркүйекте иеленген болатын. Егемен ҚР Конституциясында ол конституциялық тұрғыда бекітіліп, халықаралық деңгейде танылып, мойындалды.

70 жыл шегінде орыс тілінің көлеңкесінде қалып, тарихи тұрғыда өзінің мемлекеттік тіл ретіндегі мәнінен айырылуға шақ қалған қазақ тілін мемлекеттік тіл ретінде дамытып, оның мемлекеттік тіл есебіндегі конституциялық-құқықтық мәртебесін іс жүзінде қалпына келтіру – бүгінгі таңдағы ең өзекті мәселе. Заң тұрғысынан алғанда мемлекеттік тіл – бұл мемлекеттің бүкіл аумағында қоғамдық қатынастардың барлық саласында қолданылатын мемлекеттік басқару, заң шығару, сот ісін жүргізу

және іс қағаздарын жүргізу тілі. Мемлекеттік тіл ретінде қазақ тілінің шынайы түрде осындай сипатта болуына қол жеткізу үшін біз қазақ тілінде ойлап, сөйлей және жаза білетін қоғамды қалыптастыруымыз, соған әрқайсысымыз ат салысуымыз керек. Мемлекеттік тілді – қазақ тілін сүю, құрметтеу, оны дамытуға үн қосу Қазақстан қоғамының әрбір азаматының санасына сіңген парыз, міндет болуы керек.

Кездесу барысында заң факультетінің мемлекет және құқық теориясы мен тарихы, конституциялық және әкімшілік құқығы кафедрасының профессорлық-оқытушылық құрамы Қазақстанның ертеңгі болашағы – бүгінгі студенттерге мемлекеттік тіл ретінде қазақ тілінің мәртебесінің конституциялық бекітілуін түсіндірумен қоса, мемлекеттік тілді қажетті деңгейде игерудің маңызын, оның қажеттігін түсіндіріп, отансүйгіш азамат ретінде мемлекеттік тілді ары қарай дамытуға өзіндік үлес қосуын, қазақ тілінің жанашыры болуын аманат етті.

Айгерім ЖАРБОЛОВА,
мемлекет және құқық
теориясы мен тарихы,
конституциялық және әкімшілік
құқық кафедрасының доценті, з.ғ.к.

В КазНУ стартовал конкурс на лучший студенческий инновационный проект «Энергия молодых – энергия Будущего»